

可學耶神人言然有天命者可學之必得大
 度中賢學之亦可得大壽下愚為之可得小
 壽子欲知其效同若凡人學耳大賢學可得
 大官中賢學者可得中官愚人學者可得小
 吏夫小吏使於白衣之民乎以是言之猶當
 勉學耳真人唯唯吾為之未嘗敢懈也神人
 言然努力信道天地之間各取可宜亦無妄
 也真人唯唯請得尊天重地敬上愛下順用
 四時五行可為不敢為非也神人言善哉善
 哉子得道意矣吾不復重教示子矣

右致善除邪令人受道戒文

太平經卷之七十一

太平經卷之七十二原缺七十三至八十五 傳七
 齋戒思神救死訣第一百九
 六方真文悉再拜問前得天師言太平氣垂
 到調和陰陽者一在和精神靈歸俱分處深惟
 天師之語使能反明洞照者一一而見之其
 人積衆多何以能致此諸道士能洞反光者
 能聚之手噫大善哉天上皇氣且至帝王當
 垂拱而無憂故天道諸真人來具問至道要
 可以為大道德明君悉除先王之流災承負
 天地之間邪惡氣鬼物凶毒尸咎殃為害者
 耶故真人來一一口問此至道要也諸弟
 子亦寧自知不乎忽然不自知也今忽不自
 知何故問之歸思天師教勅有不解者今不
 自知當皆以何能聚此諸絕洞虛靖反光能
 見邪者惟之今故相與俱來共問之也善哉
 真人精益進乃知疑此天使子來悉為德君
 具問可解邪者語方今為真人具說分別道
 其要意安坐共記唯唯唯天地自有神寶悉自
 有神精光隨五行為色隨四時之氣興衰為
 天地使以成人民萬物也夫天地陰陽之間

莫不被其德化而生焉得其意者立可觀不
 得其大要意無門戶知能大開通用者大吉
 可除天地之間人所病苦邪惡之屬不知其
 大法者神亦不可得妄空致妄得空使也願
 聞其意使可萬萬世傳而不妄善哉子之問
 也然欲候得其術自有大法四時五行之氣
 來入人腹中為人五藏精神其色與天地四
 時色相應也畫之為人使其三合其王氣色
 者蓋其外相氣色次之微氣最居其內使其
 領袖見之先齋戒居間善靖處思之念之作
 其人畫像長短自在五人者共居五尺素上
 為之使其好善男思男女思女其畫像如此
 矣此者書已衆多非一通也自上下議其文
 意而為之以文書傳相微明也吾書雖多自
 有大分書以類相聚從字以相明則畢得其
 要意唯唯此四時五行精神入為人五藏神
 出為四時五行精神其近人者名為五德之
 神與人藏神相似其遠人者名為陽歷字為
 四時兵馬可以拱邪亦隨四時氣衰盛而行
 其法為其具畫像人亦三重衣王氣居外相

氣次之微氣最居內皆戴冠憤乘馬亦隨其五行色具為其先畫像於一面者長二丈五素上踈畫五五二十五騎善為之東方之騎神持矛南方之騎神持戟西方之騎神持弓弩斧北方之騎神持鑊楯刀中央之騎神持劍鼓思之當先睹是內神已當睹是外神也或先見陽神而後見內神觀之為右此者無形象之法也亦須得師口訣示教之上頭壹有關知之者遂相易曰為其易致易成宜遠於人便間處為之易集近人必難成也於其道成曰明大絕反洞者聚之病形不多少則吉少則凶或有不及所治不決解愈當得多少而可哉高得萬中得四五千下得十數百如百數十其何多也噫真人其復故愚邪安坐方為子道其大要意也今承負之後天地大多災害鬼物老精凶殊尸咎非一尚復有風濕疽疥今下古得流災眾多不可勝名也或一人有百病或有數十病假令人人各有可長或有可短或各能去一病如一下卦工師中知之除一禍崇之病大醫長於藥方

者復除一病刺工長刺經脈者復除一病或有復長於灸者復除一病或復有長於劫者復除一病或有長於祀者復除一病或有長於使神自導視鬼復除一病此有七人各除一病這除去七病下古人多病或有一人十數病乃有自言身有百病者悉無不具疾苦也盡諸巧工師各去一病這去七病其餘病自若在不盡除去七工師力已極此餘病不去猶共困人久久得窮焉故多得死不能自度於危中也人生比竟天年幾何睹病幾何遭危會衰盛進退天之格法比如四時五行有興衰也八卦乾坤天地之體也尚有休囚廢絕少氣之時何況人乎人者乃象天地四時五行六合八方相隨而壹與壹衰無有解已也故當豫備之救吉凶之源安不忘危存不忘亡理不亡亂則可長久矣是故治邪法道人病不大多假令一人能除一病十人而除十病百人除百病千人除千病萬人除萬病一人之身安得有萬病乎故能悉治決愈之也子知之邪唯唯故教其豫作戒成其道

者聚之者唯唯行子知之矣行為真人明陳列之此所治病者鬼物大邪共為盜賊夫帝王安平常備軍師兵者以備人反為無義成姦賊也故一人敢死十人不敢當十人敢死百人不敢當百人敢死千人不當千人敢死萬人不敢當萬人敢死四面橫行備其有疾病折傷故軍師乃備萬二千人者以備非常其二千人者但備以補其休通耳乃能服之也真人知之耶唯唯行子已知之矣
不用大言無效訣第一百一十
請問一事天師今太平氣毒到邪氣當息除去也然子言是也又非也然太平氣至邪固當自消去惟天地開闢以來積久邪氣大眾多更相承負太平之治氣雖至也亦安能一旦悉卒除此乎故當豫備之為其作法困窮然後求索良工已大後之矣夫上古之人人人各自知真道又其時少邪氣太上中古以來人多愚好為浮華不為真道又多邪氣狂精殃咎故人多卒窮天年而死亡也悉由用心愚闇蔽不知豫防其本也今當上德君

治天愛之不欲使其若此愚人多窮也當使
 卒其大德與天同心故天使諸真人來問疑
 使吾為其陳法可以厭禦邪不祥妖惡者故
 吾為真人具言之今真人反言當自除不備
 此言非也名為大誤君子之辭也子言不可
 用也何謂乎然有大急乃后求索之不可卒
 得也今人窮困矣故真人言大誤不可用也
 今積穀乃滿倉可以備飢餓也今為真人察
 察道之使可為萬世不忘也唯唯今飢乃教
 人種穀言耘治之待其米成乃可得火炊食
 亦豈及事邪於此已餓死困矣或不及春時
 種之至冬飢念食乃欲種穀種之不生此豈
 能及事活人邪非獨身窮舉家已滅亡矣是
 真人之一大愚無知冥冥之大效也行復為
 子說一事今人掘井所以備渴飲也居當近
 水泉所以備渴也臨渴且死乃掘井索水何
 及得也已窮矣是真人復問二愚闇復為真
 人說一事古者有穴居今者作廬宅所以備
 風雨也及不風雨之時居野極樂矣浮雲已
 起雨風已至迺作廬宅已雨寒而困窮矣是

真人三愚也復為真人說一事夫太中古以
 來聖人作縣官城郭深池所以備不然其時
 默乎平無他也及有不然小人欲汗亂君子
 乃後使民作城郭深池亦豈及急邪是真人
 劇愚暗効也行復為真人說一事今軍師兵
 不祥之器也君子本不當有也下之惡之故
 當置於鞘中堅治藏之必不貴有之也不貴
 用之也但備不然有急乃後使工師擊治石
 求其中鑲燒治之使成水乃後使良工萬鍛
 之乃成莫耶可以戰鬪禦急者亦豈及事邪
 已窮服矣死命屬矣是非六真人之大愚不
 及邪唯唯有過非過也思事當詳卜之曾心
 乃出之也後勿輕妄語也唯唯為真人道小
 決事反以明大夫古者聖賢之設作梳與杪
 以備頭髮亂而有蟲也夫人生而不櫛頭亂
 不可復理蟻蟲不可復得困乃後求索南山
 善木及象骨奇物可中櫛者使良工治之髮
 已亂不可復理頭中之蟲不可勝數共食人
 頭皆生瘡矣然後得梳與杪已窮矣然後為
 真人陳小決事以小況大夫河海五湖近水

之傍多蚊蚋不豫備作可以隱禦之者夫蚊
 蚋俱生而起飛共來食人及牛馬牛馬搔頭
 踉蹌不能復食人者大愁且死無於止息然
 后求可以厭禦之者已大窮矣真人寧明知
 之邪唯唯行子已覺矣夫良方所以能厭禦
 疥蟲善衣善處所以厭禦毒蟲不豫備之病
 之乃求索可以去之者已得大窮愁病之矣
 子知之邪唯唯是尚最天下小小財備數之
 物也何言其大巨者乎夫天地之間時時有
 是暴鬼邪物凶殃尸谷殺客當其來著人時
 比如刀兵弓弩之矢毒著人身矣所著疼痛
 不可忍其大暴劇者噬不及喻倚不及立身
 為暴狂比若間亭遠帝王之縣吏壅關斷人
 辭語不得言變事於此之時乃求索良工長
 者以自救已窮矣辭已不通無可復得言之
 矣子知之邪唯唯行子已覺矣故吾尤急此
 死亡天下大凶事也故吾文口口俾俾教有
 德人君豫備之上賢明見吾書言之必大
 覺矣中賢見吾文言必小覺下愚不覺反笑
 吾書不備其本已自窮矣天地帝王無過於

是也今行太平氣至陽德君治當得長久凡天下人死亡非小事也壹死終古不得復見天地日月也脉骨成塗土死命重事也人居天地之間人人得壹生不得重生也重生者獨得道人死而復生尸解者耳是者天地所私萬萬未有一人也故凡人壹死不復得生也故當大備之雖太平氣樂歲猶有邪氣比若一家雖善中猶有惡人但相忍耳是故益聚道術士者為有不然輒當除之不疾除之則生之矣故教其豫多其人也夫大學所以益積道德之人者備求可得也如不豫蓄聚求不可卒得也如有變事欲問古今比列不豫有大深道德之人無能卒對解者令人君闇蔽卒有疑事問之不以時決解愁乃後往求索遠方賢明深術何及於僕僕當前手哉真人知之邪唯唯行子已大覺矣雖每發言有過責不問又會不知之願決一事言之今是或高則萬人中則數千下則數百何可卒得卒成乎善哉子之問事也但教十數人以善成之且自轉相易有急効之有成功者令

使上德道者重之愛之於其有功者賜之衆人且願之於其願之而大從使其為之於其得者共尊敬愛之此四時五行天地之神精見尊重愛莫不說喜使人吉利德君長蒙其吉福衆賢深下及愚人莫不爭欲為之也即為者日益多以久久大小盡化能人人為之乃選取其中第一大功者悉聚之大有功者署其位小有功者賞賜之天下人莫不欲為之但恐大多不可勝記何患憂少哉真人何其大愚暗且蒙也一事大決毋取用但好大言者也是人無益於人也但効式之常有成功者即其人得道意大信人也知但數言而無大効者即是其不得道意而妄語大佞人也不可用也亂道者也真人知之耶唯唯行去慎之戒之誦讀吾書惟思其上下意以類相從更以相證明以相足也廼且大解知吾道所指趣也唯唯

五神所持訣第一百一十一

願請問一大決東方之神何故持矛乎然可毋問也真人必自知之所以問者天師幸哀

後生為作法不問則令後世不得知天道之意決然此者天之象也物者各從其類東方者物始牙出頭盡生利刺土而出其精象矛故為矛其神吏來以此為節南方萬物葉枝布葉若戟故其精神而持戟其神吏來以此為節西方為弓弩斧西方者天弩殺象夫弓弩斧亦最傷害之長也故其神來以此為節北方為鑊楯刀北方者物伏藏逃鑊楯所以逃身者也刀者小人所服亦常以避逃以害人非上君子之有也故其神來亦以此為節中央者為雷為鼓為劍中央者土也五行之主也鼓亦五兵之長也劍亦君子道德人所服也亦五兵之長也故中央神來以此為節是天地自然實信之符節也比若人生當有頭應此持其節實信符傳來對不若此即非其行神也應他神妄來對悉為亂政久久其治亂難平安故皆求信符節也真人知之耶唯唯是說乃淺而深雖不足道者反乃當與天地四時五行氣相應和善哉善哉行真人知之矣

右厭邪人盡變成道以救死命訣

太平經卷之七十二

太平經卷之八十六原佚八十七

來善集三道家書訣一百二十七

傳八

六方真人俱謹再拜前得天師教人集共上書嚴勅歸各分處結習心思其意七日七夜六真人三集議俱有不解三集露議者三睹天流星變光一者見流星出天門入地戶再者見流星出太陽入太陰三者見列宿流入天獄中因三并而共策之恐天師三通行書為下所斷絕使不得上通復令天怒重忿怒上皇氣不得來也令帝王道德之君固固承負先王餘災不絕而得愁苦焉咄咄六真人為皇靈共來問事益精進天焉哉吾見諸弟子言無可復以加諸真人也今試自說其流星意六弟子愚蔽敢不言初始一流星出天門入地戶天門者陽也君也地戶者陰也民臣也今民臣其行不流而上附返上施恩於下夫門戶乃主通事今下戶不上行返上門通門而下知為下辭會見斷絕不得上行也善哉真人言吾無以加之也行雖苦復說二事唯唯二事見太陽星乃流入太陰中太陽

君也太陰民臣也太陽明也太陰闇昧也今闇昧當上流入太明中此若民臣闇昧無知困窮當上自附歸明王聖主求見理冤結今反太明下入闇昧中是象詔書施恩下行者見斷絕闇昧而不明下治內獨亂而闇蔽其上也又象比近下民所屬長吏共蔽匿天地災變使不得上通冥冥與民臣共欺其上共為姦之證也善哉善哉吾無以加六子言也行雖苦復說其三事唯唯三事見列宿星流入天獄中夫列宿者善正星也乃流入天之獄獄者天之治罪名處也恐列士善人欲為帝王盡力上書以通天地之談返為閒野遠京師之長吏所共疾惡後返以他事害之故列宿乃流入獄中也善哉精哉吾無以加六子言今六子問事乃何一怒也獨不懈倦耶不敢也常見天師言真人為天來問事今欲止恐天辭不通今凡人命屬天地天地不喜返且害病人則不得竟吾天年壽矣善哉真人之言是也不失之也今吾為諸真人說亦不敢遺懈止也吾與諸真人等耳俱命屬